



18. Oktober 2011

Inatsisartut suleriaasianni § 37 naapertorlugu Naalackersuisunut apeqqut imaattoq matumuuna saqqummiuppara:

**Naalackersuisunut Apeqqut:**

1. **Sinerissap qanittuani aqutsiveqarfimmi Qeqertarsuup Tunuani qaleralittassiissutit ukioq naanngitsoq nunguttussanngortut Naalackersuisut paasissutissiissutigivaat, taamaammat apeqqutiginiarpara pisassiisoqaqqissava?**
2. **Pisassiisoqaqqinnianngippat aalisartut sulisartullu qassit eqqorneqassappat?**

(Inatsisartuni ilaasorta, Kristian Jeremiassen Siumut)

**Tungavilersuut**

Aningaasaqarnikkut ajutoornersuaqassaaq Qaasuitsup Kommunea-ni sinerissap qanittuani aqutsiveqarfimmi Qeqertarsuup Tunuani qaleralittassat nunguppata, aalisartut sulisartullu angerlartiinnaqarpata.

Aqutsiveqarfik Uummannap eqqaani qaleralittassat nungukkaangata Naalackersuisut politik-iat malillugu angerlartiinnaqartarput, aqutsiveqarfimmi Qeqertarsuup Tunuani qaleralittassiissutit nungunneqarnissaat ilimagigaat Naalackersuisut ilisimatippaanga Oktober-ip aallartinnerani apeqquteqaatinga akineqarmat.

Manna ilutsillugu ajornartorsiutip pilinnginnarani Naalackersuisut qinnuigivakka pisassat ilaneqarnissaanik taamaalilluni aalisartut sulisartullu angerlartiinnaqassanngillat.

Juulli qanilliartorpoq aningaasanik atuiffiulluartartoq, aalisartut sulisartullu qitornaat juullimi allatulli meeqqatut juullisiorsinnaasariaqartut qularnaarneqartariaqarpoq isumaqarpunga.

Kaammattuinera tamaanga killissinnarlugu apeqqutigivara Qeqertarsuup Tunuani qaleralittassiissutit nunguppata pisasseeqqinniarpata Naalackersuisut?

Apeqqutip aappaa tassaavoq pisassiisoqaqqinnianngippat aalisartut sulisartullu qassit eqqorneqassappat?

Takussutissianngorlugit nassiunneqarnissaat qinnutigivara, aalisartut qassit angerlartiinnaqassanersut tassani takussutissianngorlugit nunaqarfinni qassit aammalu illoqarfinni angerlartiinnaqassanersut.

Taamatullu sulisartut qassit illoqarfinni nunaqarfinnilu angerlartiinnaqartussat qassiunersut takussutissianngorlugit nassiteqquneqarput.

Kissaatigaara apeqquteqaatikka ullut suliffiusut qulit iluanni akineqareersimanissaat.